

DOMENIE XXI «VIE PAL AN»

Jutoris pe Liturgjie

Domenie, ai 25 di Avost dal 2019

Cheste domenie nus dîs tant tes sôs leturis e il vanzeli di vuê, come al so solit, al pò indreçâ nus sul troi de salvece in cheste societât li che il slontanâsi de glesie al sta diventant une realtât simpri plui visibil.

La domande di vuê e je: Signôr, sono pôcs chei che si salvin?. Ma o podìn ancje domandâsi; Ce salvece cirie la nestre societât laiche? Nol è che ancje nô o cirìn di risolti dut midiant dai prodots de tecnologjie? A ce pensìn cuant che tal Pari nestri o disìn che al vegni il to ream ?

Lis leturis di vuê no son ni par avilîsi ni par cjantâ vitorie. Nus presentin invezit il mût di operâ di Diu in cheste nestre puare glesie e umanitât; nus visin in particolâr che: Fasêt atenzion, i miei pinsîrs no son i vuestris pinsîrs / e lis mês stradis no son lis vuestris stradis (Is 55, 8) al dîs il Signôr.

Antifone di jentrade

cf. Sal 85,1-3

Slungje la tô orele, Signôr, e rispuindimi:
gno Diu, salve il to famei che in te al spere;
ve dûl di me, Signôr,
ch'ò ai berlât viers di te dute la zornade.

Colete

Diu, che tu unissis tun sôl volê i cûrs dai tiei fedêi,
daur ai tiei popui di volê ben a ce che tu comandis
e di bramâ ce che tu desideris
par che, framieç dai savoltaments di chest mont,
i nestris cûrs a sedin pontâts là ch'e je la vere gjonde.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 66,18-21

A tornaran a menâ dongje ducj i vuestris fradis di ducj i forescj.

L'autôr di cheste leture al ven clamât Tierç Isaie; al è un dissepul dal profete nomenât Secont Isaie (secul VI) e al vîf a Gjerusalem cui rimpatriâts di Babilonie (secul V). Al partecipe des grandis riflessions teologjichis che i sapients di Israel a àn elaborât a partî de tragedie dal esili (586 p.d.C.).

L'esili al à fat madurâ tal popul la convinzion che, o disaressin noaltris vuê, il Spirtu Sant al lavore dapardut, adiriture fra i nemîs dai Ebreus, e in ducj i popui il Signôr al cjate servidôrs valits e fedêi ancje miôr che in Israel o fra i cristians.

Te continue polemiche sui rifugjâts che a cjatin dome puarts sierâts, mûrs di fil di fier e puartis inclostradis, cence nissune politiche degne di chest non, il profete al viôt tant plui lontan di nô e nus vierç i vôi sul mût di operâ di un Signôr che al ven a tirâ dongje ducj i forescj e dutis lis lenghis.

Dal libri dal profete Isaie

Cussi al dîs il Signôr: «O vignarai a tirâ dongje ducj i forescj e dutis lis lenghis; lôr a vignaran e a viodaran la mê glorie. Ur darai un segnâl e o mandarai cualchidun dai lôr, ch'a son restâts, de bande dai forescj, de bande des isulis lontanis che no an sintût a fevelâ de mê innomine e che no an

viodude la mê glorie; lôr a contaran la mê glorie framieç dai forescj. A tornaran a menâ dongje ducj i vuestris fradis di ducj i forescj come ufierte al Signôr sun cjavai, sun cjars, sun quartantinis, sui mui e sui dromedaris, te mê sante mont di Gjerusalem, al dîs il Signôr, come che i fîs di Israel a puartin l'ufierte in vâs monts tal templi dal Signôr. Ancje framieç di lôr mi cjolarai predis e levits». Peraule di Diu.

SALM RESPONSORIÂL

dal Salm 116

Il panorame mondiâl spalancât te prime leture al fâs burî fûr cumò chest salm responsoriâl colm di maravee, di ricognossince, di laude, di gjonde pe opare mistereose che Diu al sta fasint fra di nô: dâ dongje ducj i popui e no dome i cristians, par cjantâ la sô glorie.

R. Ti adoraran, Signôr, ducj i popui de tiere.

Se cjantât: Il cjant dai salms responsoriâi, p.

Laudait il Signôr, ducj vualtris popui,
ducj vualtris, forescj, cjantait la sô glorie. **R.**

Al è stât grant par nô il so boncûr
e la fedeltât dal Signôr e dure par simpri. **R.**

SECONDE LETURE

Eb 12,5-7.11-13

Il Signôr al corêç chel che i sta a cûr.

Cjalant a lis glesiis desertis, a lis gnovis gjenerazions che nus bandonin, o vin ce patî e ce lagrimâ, ma no vin di lamentâsi di nuie. Masse grandis, come che al dîs pape Francesc, a son lis prepotencis-straftencis dal sisteme glesiastic tai secui. E se e esist une justizie di Diu, ancje noaltris catolics o varin di paiâ il mâl fat. Al è pe vuestre corezion ch'o patîs! e cuâl esal chel fi che il pari no i fâs une corezion?

Se e cole cheste religjon, no cole la religjon. O vin dome dibisugne di metile dute par jentrâ pe puarte strete: formâ in umiltât piçulis comunitâts che si rinovin in umiltât e pazience dongje de peraule-vite di nestri Signôr e in compagnie dai tribulâts. Dut il rest al ven dopo.

De letare ai Ebreos

Fradis, o vês za dismenteade la raccomandazion che us è stade fate tant che a fîs: fî gno, no sta spreseâ la corezion dal Signôr e no sta butâti jù cuant che lui ti corêç; parcè che il Signôr al corêç chel che i sta a cûr e al cjastie chel che lu ten in cont di fî.

Al è pe vuestre corezion ch'o patîs! Diu us trate come fîs; e cuâl esal chel fi che il pari no i fâs une corezion? Sigûr che ogni corezion, sul at, no nus da ligrie ma displasê; dopo però e bute pês e justizie a di chei ch'è a indreçâts.

Pa la cuâl, tirait sù lis vuestris mans ch'a pendolin e i zenôi clopadiçs e dreçait i trois stuarts pai vuestris pas, par che il pît clopadiç nol vedi di strupiâsi, ma anzit di comedâsi. Peraule di Diu.

CJANT AL VANZELI

cf. Lc 13,29

R. Aleluia, aleluia.

Ducj i popui, di soreli jevât a soreli a mont,
a cjapan part tal gustâ dal ream di Diu.

R. Aleluia.

VANZELI

Lc 13,22-30

A vignaran di soreli jevât e de tramontane e ducj a varan part tal gustâ dal ream di Diu.

Signôr, sono pôcs chei che si salvin?. Signôr, sono pôcs *i cristians* che si salvin?».

E je une domande legjitime te situazion de glesie che o stin vivint e lis rispuestis di Gjesù a diventin segnâi stradâi ben precis su la direzion di cjapâ.

Peraulis come: puarte strete... inclostrade la puarte... Signôr vierzinus...no us cognòs... o patissareis ungrum... ultins prins... prins ultins nus fasin fermâ par lassâsi lavorâ de peraule mistereôse e clare dal Mestri di Nazaret.

Nissun sa li che la nestre glesie e sta lant; Gjesù ancje in chest vanzeli al pues iluminânus par no sierâsi tun museu ormai superât e par no vierzisi a mat vie.

Dal vanzeli seont Luche

In chê volte, Gjesù al passave par citâts e par borcs insegnant e intant al leve viers di Gjerusalem. Un i domandà: «Signôr, sono pôcs chei che si salvin?».

I rispuindè: «Metêtle dute par jentrâ pe puarte strete, parcè che us garantis che une vore di lôr a ciraran di jentrâ ma no rivaran. Dopo che il paron di cjase al sarà jevât sù e al varà inclostrade la puarte, vualtris o scomençarês a restâ difûr e a tucâ te puarte disint: Signôr, vierzinus. Ma lui us rispuindarà: No us cognòs; no sai di dulà ch'o vignîs. Alore o scomençarês a dî: O vin mangjât e bevût denant di te, e tu tu sês passât insegnant pai nestris borcs. Tal ultin lui us disarà: Jo no sai di dulà ch'o sês. Slontanaitsi di me, ducj vualtris ch'o fasês dome mâl! Li o ciularês e o patissarês un grum cuant che o viodarês Abram, Isac e Jacop e ducj i profetis tal ream di Diu, e vualtris difûr. A vignaran di soreli jevât e di soreli a mont, de tramontane e dal misdi e ducj a varan part tal gustâ dal ream di Diu. E ve che un pôcs di chei che cumò a son fra i ultins a saran i prins, biel che altris di lôr che cumò a son i prins a saran i ultins».

Peraule dal Signôr.

Su lis ufiertis

Signôr, che cuntune sole vitime,
ufierte une volte sole,
tu ti sês cuistât un popul di fîs,
danus, inte tô Glesie, la gracie de unitât e de pâs.
Par Crist nestri Signôr.

Antifone a la comunion

cf. Sal 103,13-15

Cul prodot des tôs voris tu passis la tiere, Signôr,
par tirâ fûr il pan de tiere e il vin ch'al indalegri il cûr dal om.

Daspò de comunion

La midisine dal to boncûr, Signôr,
ch'e operi adimplen dentri di nô
e judinus e rifinissinus
in mût di fâti content in ogni nestre vore.
Par Crist nestri Signôr.

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Papa Francesco richiama i pastori: **“ a guardare continuamente al santo popolo fedele di Dio; tutti facciamo il nostro ingresso nella chiesa come laici. Il primo sacramento, quello che suggella per sempre la nostra identità, è il Battesimo. Nessuno è stato battezzato prete né vescovo. Ci hanno battezzati laici ed è il segno indelebile che nessuno potrà mai cancellare.**

Ci fa bene ricordare che la chiesa non è una élite dei sacerdoti, dei consacrati, dei vescovi, ma che tutti formiamo il santo popolo fedele di Dio e dimenticarci di ciò comporta rischi e deformazioni nella nostra stessa esperienza, sia personale sia comunitaria.

Pape Francesc

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrivêt a info@glesiefurlane.org*